

NEFND UM EFTIRLIT MEÐ LÖGREGLU

Borgartún 29, 105 Reykjavík

Sími: 545 8800

Netfang: nel@nel.is

Heimasíða: www.nel.is

Skýrsla
nefndar um eftirlit með lögreglu
Árið 2022

Reykjavík, 19. desember 2023

Efnisyfirlit

Inngangur	2
2. Skipun nefndar um eftirlit með lögreglu	2
Samkvæmt 35. gr. lögreglulaga nr. 90/1996, sbr. 1. gr. laga nr. 62/2016, er nefnd um eftirlit með lögreglu skipuð með eftirfarandi hætti:	2
3. Hlutverk nefndar um eftirlit með lögreglu	3
3.1 Starf- og greining nefndarinnar	4
4. Almenn um verkefni og aðstæður lögreglu – ályktanir nefndarinnar.	4
4.1 Fjöldi mála	5
4.2 Staða mála 31. desember 2022.....	6
4.3 Málsmeðferð nefndarinnar.....	7
4.4 Embætti sem mál varðar.....	8
4.5 Málsmeðferðartími	9
4.6 Málum lokið frá stofnun nefndarinnar til ársins 2022.	10
4.7 Frumkvæðisathuganir.	10
5. Yfirlit um starfsemi ársins 2022.....	11
5.1 Skipulag og starfsaðstaða	11
5.2 Yfirlit yfir fundi nefndarinnar.....	11
5.3 Fjármál nefndarinnar.....	11

Inngangur

Nefnd um eftirlit með lögreglu tók til starfa þann 1. janúar 2017, við gildistöku laga nr. 62/2016, um breytingu á lögreglulögum nr. 90/1996. Meginbreyting fyrrnefndra laga var stofnun nefndarinnar með það fyrir augum að auðvelda almennum borgurum að koma á framfæri kvörtunum vegna starfsaðferða eða framkomu lögreglu, kærum á hendur lögreglumönnum fyrir ætluð refsiverð brot og jafnframt að stuðla að því að mál fái viðeigandi meðferð innan stjórnarsýslunnar. Þannig þurfi almennir borgarar ekki að vera í vafa hvert eigi að leita með aðfinnslur við störf lögreglu þó svo að einnig sé hægt að koma þeim að hjá lögregluembættum landsins sem og héraðs- og ríkissaksóknara. Þá var nefndinni falið með fyrrnefndum lögum að taka til athugunar mál þegar borgari slasast eða lætur lífið í lögregluaðgerð. Loks getur nefndin tekið mál upp að eigin frumkvæði.

Nefndin hefur nýlega lokið sjötta starfsári sínu og almennt hefur starfsemin gengið vel. Er sú skýrsla sem birtist hér jafnframt sjötta ársskýrsla nefndarinnar. Nefndin hefur aðsetur í Borgartúni 29¹ og hefur haft lögfræðing í fullu starfi frá 1. janúar 2018. Símatími lögfræðings nefndarinnar er alla virka daga frá kl. 10:00 til 11:00. Það er mat nefndarinnar að hún þarfnist að minnsta kosti stöðugildi eins lögfræðings til viðbótar á næstu misserum miðað við óbreytt verkefnaálag, ekki síst til að stytta málsmeðferðartíma nefndarinnar. Hvort rétt sé talið að auka slagkraft nefndarinnar umfram það, m.a. til þess að geta tekið mál til umfjöllunar að eigin frumkvæði í auknum mæli ásamt því að efla valdheimildir nefndarinnar er háð pólitískri stefnumótun og fjárveitingum. Nefnd um eftirlit með lögreglu hefur komið á framfæri tillögum sínum til dómismálaráðuneytisins ásamt tillögum um eitt starfsígildi til viðbótar.

2. Skipun nefndar um eftirlit með lögreglu

Samkvæmt 35. gr. lögreglulaga nr. 90/1996, sbr. 1. gr. laga nr. 62/2016, er nefnd um eftirlit með lögreglu skipuð með eftirfarandi hætti:

„1. Ráðherra skipar nefnd sem hefur eftirlit með störfum lögreglu. Nefndin er sjálfstæð stjórnarsýslunefnd og er ekki unnt að skjóta ákvörðunum hennar til æðra stjórnvalds.

2. Nefndin skal skipuð þremur mönnum og jafnmörgum til vara. Nefndarmenn skulu hafa lokið embættis- eða meistaraþrófi í lögfræði. Mannréttindaskrifstofa Íslands tilnefnir einn nefndarmann, Lögmannafélag Íslands annan en ráðherra skipar þann þriðja án tilnefningar og skal hann jafnframt vera formaður nefndarinnar. Varamenn skulu tilnefndir og skipaðir á sama hátt. Nefndarmenn skulu skipaðir til fjögurra ára í senn. Formaður ræður starfsmenn eftirlitsnefndar. Ráðherra ákveður laun og önnur starfskjör nefndarmanna.“

Aðalmenn í nefndinni árið 2021 voru eftirtaldir: (1) Skúli Þór Gunnsteinsson, lögfræðingur í Samgöngu- og sveitastjórnarráðuneytinu, tilnefndur af ráðherra og formaður nefndarinnar. (2) Þorbjörg Inga Jónsdóttir lögmaður, tilnefnd af Mannréttindaskrifstofu Íslands, og (3) Kristín Edwald lögmaður, tilnefnd af Lögmannafélagi Íslands. Varamenn eru eftirtaldir: (1) Margrét Einarsdóttir, prófessor, tilnefnd af ráðherra og er varaformaður nefndarinnar, (2) Flosi Hrafn Sigurðsson lögmaður, tilnefndur af Mannréttindaskrifstofu Íslands, og (3) Grímur Sigurðarson lögmaður, tilnefndur af Lögmannafélagi Íslands.

¹ Nefndin flutti aðsetur sitt þann 1. desember 2022.

Nefndarmenn sinna nefndarstörfum samhliða öðrum störfum sínum og eru allir nefndarmenn í fullri vinnu annars staðar. Formaður nefndarinnar var í leyfi frá störfum frá desember 2022 til 31. desember og sinnti varaformaður skyldum formanns á meðan.

Nánari upplýsingar um nefndina og starfsemi hennar má finna á heimasíðu nefndarinnar; www.nel.is. Upplýsingar um helstu verkefni ársins 2021 og um rekstur nefndarinnar má jafnframt finna í yfirliti í kafla 5.

3. Hlutverk nefndar um eftirlit með lögreglu

Hlutverk nefndar um eftirlit með lögreglu felst í stuttu máli í að taka við erindum sem henni berast, greina þau og senda áfram til viðeigandi embætta til úrvinnslu. Nefndin getur einnig vísað málum frá ef þau heyra ekki undir valdsvið nefndarinnar eða ekki talið tilefni til að aðhafast frekar í málinu á grundvelli gagna frá viðkomandi embætti. Nefndin fylgist með því að mál fái úrvinnslu hjá öðrum stjórnvöldum, það er fyrst og fremst hjá handhöfum ákærvalds og/eða innan viðeigandi lögregluembætta. Þegar máli er lokið og niðurstaða liggur fyrir getur nefndin sent frá sér ákvörðun eða tilmæli sem þó eru ekki bindandi að lögum. Nefndin hefur engar rannsóknarheimildir en hefur þó víðtækar heimildir til að afla gagna frá handhöfum ákærvalds og lögregluembættum landsins, sbr. 5. mgr. 35. gr. a, lögreglulaga nr. 90/1996, sbr. 1. gr. laga nr. 62/2016. Samkvæmt ákvæðinu er ríkissaksóknara, héraðssaksóknara og lögreglustjórurum, þ.m.t. ríkislögreglustjóra, skylt að afhenda nefndinni þær upplýsingar sem hún þarf til að sinna starfsskyldum sínum. Nefndin hefur ekki heimildir til að hlutast til um niðurstöðu mála eða meðferð þeirra hjá þeim embættum sem fara með þau.

Mál sem falla undir nefndina má skipta í þrjú flokka: (1) mál sem varða mögulega eða ætlaða refsiverða háttsemi lögreglumanna, (2) mál þar sem lögreglumenn hafa mögulega sýnt af sér ámælisverða háttsemi án þess að hún sé refsiverð, (3) mál sem varða verklag, starfshætti eða aðbúnað lögreglu í víðara samhengi, sjá 1. mgr. 35. gr. a lögreglulaga nr. 90/1996, sbr. 1. gr. laga nr. 62/2016.

Ástæða er til að vekja sérstaka athygli á því að nefndin endurskoðar ekki eða fjallar almennt um mat lögreglu á beitingu úrræða á grundvelli lögreglulaga eða almennt um framkvæmd rannsóknar sakamála, beitingu rannsóknarúrræða eða um ákvarðanir handhafa ákærvalds um það hvort rétt sé að gefa út ákæru í máli. Heyrir slíkt eftirlit undir embætti Ríkissaksóknara sbr. 21. gr. laga um meðferð sakamála nr. 88/2008.

Í þeim tilvikum er nefndin vísar málum áfram til meðferðar hjá handhöfum ákærvalds og/eða lögreglustjórurum landsins, getur sá tími frá því að nefndin gefur út ákvörðun þar sem farið er fram á frekari meðferð og þar til nefndin telur að málið hafi fengið fullnægjandi meðferð, verið umtalsvert langur. Ræðst málsmeðferðartíminn fyrst og fremst af því hversu langan tíma það tekur viðkomandi embætti að afgreiða málin til nefndarinnar. Þetta er einnig ástæðan fyrir því að það hefur tekið nefndina langan tíma að fá yfirsýn yfir umfang þeirra málefna sem henni er ætlað að hafa eftirlit með. Nú er slík reynsla komin og ljóst er að rýmka þarf málsmeðferðartíma nefndarinnar svo henni sé unnt að greina og koma með skýrar ákvarðanir með hliðsjón af málsatvikum öllum og gögnum sem berast frá lögreglustjóra og ákærvaldi.

3.1 Starf- og greining nefndarinnar

Nefnd um eftirlit með lögreglu setti sér starfsreglur árið 2017 sem voru síðar aðlagðar í samræmi við aukna greiningarvinnu og breytta starfshætti nefndarinnar í október 2019.

Þegar nefndinni berst erindi, sbr. 35. gr. a. laga nr. 90/1996, tekur starfsmaður nefndarinnar á móti því, staðfestir móttöku og kannar hvort efni þess sé fullnægjandi til þess að nefndin geti tekið ákvörðun og óskar eftir viðbótargögnum og skýringum þar sem það á við. Kannað er hvort rannsóknarhagsmunir krefjist þess að sönnunargögn verði varðveitt og ef svo er gerir nefndin viðeigandi ráðstafanir í því efni og sendir beiðni um afhendingu gagna og varðveislu sönnunargagna. Nefnd um eftirlit með lögreglu leggur mikið upp úr að gagnaöflun, greining og ákvarðanir einkennist af nákvæmni og endurspegli vönduð vinnubrögð. Þegar nefndin hefur aflað allra viðeigandi gagna frá ákærvalds- og löggæsluembættum, þar með taldar upptökur, þar sem þær eru að finna í upplýsingakerfum lögreglu, greinir nefndin erindið og fyrirleggjandi gögn. Í einstaka tilfellum, þar sem það á við, hafa nefndinni verið sendar upptökur úr eftirlitsmyndavélum; til dæmis á Austurvelli og á Laugavegi, upptökur úr snjallsímum tilkynnanda/borgara og eftir atvikum fjölmiðla.

Þegar ákvörðun hefur verið tekin er hún kynnt kvartanda og viðkomandi lögregluembætti með ósk um að embættið kynni viðkomandi lögreglumönnum niðurstöðu ákvörðunarinnar. Að því loknu, hafi nefndin vísað máli til þóknanlegrar meðferðar til ákærvalds- eða löggæsluembættis, fylgist nefndin með afdrifum málsins, meðal annars því að hinn þriggja mánaða tímafrestur sem tilgreindur er í reglum nr. 222/2017 sé virtur. Nefndin innir embætti eftir niðurstöðu, að jafnaði, innan 10 daga frá því að þriggja mánaða tímafresturinn er liðinn. Þegar niðurstaða embættis liggur fyrir er lagt mat á það hvort tilefni sé til frekari viðbragða af hálfu nefndarinnar, þá í formi sérstakrar ákvörðunar. Að málsmeðferð lokinni er tilkynnanda og viðkomandi embætti tilkynnt um málalýktir nefndarinnar með formlegum hætti.

4. Almennt um verkefni og aðstæður lögreglu – ályktanir nefndarinnar.

Svo sem fram hefur komið í fyrri skýrslum nefndarinnar er lögreglan að standa sig ágætlega í störfum sínum þegar á heildina er litið. Einkum eru upptökur úr búkmyndavélum lögreglumanna óyggjandi sönnun þess. Nefndin telur að nokkur þúsund handtökur, jafnvel allt að 8000 handtökur, fari fram á ári hverju hér á landi. Það að rúmlega 100 mál komi til kasta eftirlitsnefndar lögreglu, mál sem flest tengjast handtökum, verður að teljast frekar lítið. Mörg málanna reynast tilhæfulaus og eru upptökur búkmyndavélanna sem sýna fumulaus og rétt vinnubrögð lögreglumanna afar mikilvæg sönnunargögn ásamt upptökum úr lögreglubifreiðum. Því er það ráðgáta nefndarinnar hvers vegna lögreglumenn láta hjá líða að nota upptökubúnað sem þennan í samskiptum sínum við borgarann.

Vangaveltur eru uppi hvort og hvenær lögreglumaður eigi að slökkva á myndavél þegar hann kemur í viðkvæmar aðstæður hjá fólki. Sjónarmið persónuverndar benda til þess að lögreglumenn eigi að slökkva á upptöku ef lögreglumaður kemur í aðstöðu þar sem einstaklingur er í mjög viðkvæmri stöðu, er t.d. án fata og veikur. Nefndin telur þá framkvæmd ekki vera í samræmi við tilgang þessara véla. Nefndin bendir á að lögreglan þarf að hafa afskipti af fólki í sínu versta ástandi. Fólk er ofurölvi eða undir áhrifum fíkniefna, er ofuræst, í geðrofi, í „excited delirium“ ástandi, er jafnvel án fata o.s.frv. Í því ástandi getur fólk ráðist á eða að lögreglu eða upplifað að hafa orðið fórnarlamb misnotkunar eða niðurlægingar. Þá er myndefnið oft eina sem til er til sönnunar. Myndefnið er m.ö.o. oft mjög viðkvæmt og því væri lögreglan eðli málsins samkvæmt oftast með slökkt á vélunum ef sjónarmið persónuverndar

fengju að ráða. Þannig er það mat nefndarinnar að rétt að hafa búkmyndavélarnar alltaf í gangi þegar lögregla hefur afskipti af borgurunum. Þetta er að mati nefndarinnar atriði sem löggjafinn þarf að taka til skoðunar. Myndefni vélanna á ekki undir neinum kringumstæðum að vera aðgengilegt óviðkomandi og á það að sæta strangri gæslu og eiga lögreglumenn ekki að geta skoðað myndefni í vinnutíma svo dæmi sé tekið. Lögreglumenn, sem og almenningur eiga að geta treyst því. Þannig eiga stjórnvöld, þ. á m. sú stofnun sem sér um eignir ríkisins hverju sinni, að tryggja að lögregluyfirvöld og eftirlitsaðilinn séu með viðeigandi og öruggt húsnæði. Aðeins á að vera hægt að nýta myndefni sem sönnunargögn í sakamállum og við eftirlit.


Á árinu 2022 komu nokkur mál til kasta nefndarinnar sem vörðudu einstaklinga undir 18 ára aldri eða samtals átta mál. Um er að ræða mál nr. 7, 8, 12, 26, 43, 57, 67 og 69 og eru þau birt á vef nefndarinnar. Í öllum málunum var það mat nefndarinnar að ekki hafi verið tilefni til að aðhafast frekar. Efni þessara mála vekja ekki sérstaka athygli nefndarinnar en nefndin telur ástæðu til vegna þessara mála að vekja athygli forráðamanna á skyldum lögreglu við afskipti einstaklinga undir 18 ára. Í þessu samhengi vill nefndin benda á að lögreglu er skylt að hafa afskipti af börnum yngri en 16 ára sem eru á stöðum þar sem heilsu þeirra eða velferð er alvarleg hættu búin og koma þeim í hendur forsjármanna eða barnaverndaryfirvalda ef nauðsynlegt þykir, sbr. 18. gr. lögreglulaga nr. 90/1996. Í barnaverndarlögum nr. 80/2002, 18. gr., er kveðið á um skyldu lögreglu til að tilkynna barnaverndarþjónustu ef grunur leikur á um að barn, 18 ára eða yngra, hafi framið eða hafa verið framið gegn barni brot gegn almennum hegningarlögum eða barnaverndarlögum eða brot gegn öðrum lögum sem varðað getur þyngri refsingu en tveggja ára fangelsi. Þá skal barnaverndarþjónustu gefinn kostur á að fylgjast með meðferð málsins. Fulltrúa barnaverndarþjónustu skal vera gefinn kostur á að vera viðstaddur skýrslutöku af barni sem sakborningi í samræmi við ákvæði laga um meðferð sakamála, svo og skýrslutöku af barni sem brotþola og sem vitni. Nefndinni þykir ástæða til að benda foreldrum sérstaklega á að foreldrar eiga ekki skýlausan rétt á því að vera viðstaddir skýrslutöku barna sinna hjá lögreglu sér í lagi ef það er talið geta haft áhrif á skýrslutökur.

Að lokum er rétt að benda á að á árinu 2022 komu til nefndar þrjú mál þar sem kvartað var yfir meintum kynþáttafordómum lögreglu, sjá mál 18, 35 og 67 sem birt eru á vefnum. Í öllum málunum var það mat nefndarinnar að ekki væri tilefni til að aðhafast frekar. Í máli 35 og 67 var talsverðu myndefni til að dreifa sem bar sakir af lögreglu. Í máli 35 var ekki hægt að túlka myndefnið á þann veg að lögreglan hefði sýnt af sér kynþáttafordóma á vettvangi. Sama gildi um mál nr. 67. Í máli nr. 18 voru lögreglumenn í sóttvarnargalla og báru svo við að þeir gátu ekki borið slíkar vélar. Vissulega skorti þarna ákveðna sjónræna sönnun en önnur gögn bentu ekki til kynþáttafordóma lögreglu. Nefndin telur rétt að fjalla um þessi mál hér á þessu stigi til að bera saman við þau ár sem fram undan eru.

4.1 Fjöldi mála

Árið 2022 komu samtals 82 mál til meðferðar nefndar um eftirlit með lögreglu. Fjöldi innkominna mála skiptist með eftirfarandi hætti á milli mánaða:


Fjöldi mála 2022



Eins og sjá má er málafjöldinn hvað mestur í ágúst og desember. Árið 2021 var málafjöldinn mestur í mars og ágúst. Engin mál voru skráð í júlí vegna sumarleyfis starfsmanns nefndarinnar.

4.2 Staða mála 31. desember 2022

Staða mála sem heyra undir nefnd um eftirlit með lögreglu var með eftirfarandi hætti við áramótin 2022/2023:




Taflan hér að framan hefur að geyma upplýsingar um stöðu mála hjá nefndinni þann 31. desember 2022. Mál sem biðu greiningar nefndarinnar voru alls 46. Undir flokknum „Mál sem nefndin hefur sent áfram til meðferðar eða fengið tilkynningu um frá lögreglu eða ákærvaldi“ voru málin alls 75 þar með talin eru mál sem send hafa verið áfram og meðferð þess ekki lokið


af hálfu nefndarinnar. Við lok árs 2022 hafði nefndin lokið meðferð 135 mála ýmist með ákvörðun eða athugun nefndarinnar á tilefni til eftirfylgni.

4.3 Málsmeðferð nefndarinnar


Hér að neðan má sjá yfirlit yfir hver málsmeðferð nefndarinnar var og afdrif mála eftir mánuðum ásamt útlistun á því undir hvaða embætti málin falla.



Á myndinni hér fyrir ofan er tíundað hve margar kvartanir og kærur bárust nefndinni, hversu margar ákvarðanir voru teknar um að framsenda mál, hversu mörg mál nefndin lauk umfjöllun um, ákvarðanir nefndarinnar um að hefja frumkvæðisathugun og þær frumkvæðisathuganir sem nefndin lauk umfjöllun um.




Ofangreind línurit sýnir fjölda þeirra erinda sem voru send til þóknanlegrar meðferðar eftir mánuðum.




Hér má sjá afdrif þeirra mála sem tekin voru til umfjöllunar og ákvörðunar á fundum nefndarinnar árið 2022. Þau mál sem nefndin sendi ekki áfram til frekari meðferðar eru alls 52 á móti 13 málum sem send voru til frekari meðferðar. Í þremur málum beindi nefndin tilmælum annars vegar til ríkislögreglustjóra og hins vegar til Lögreglustjórans á höfuðborgarsvæðinu.

4.4 Embætti sem mál varðar

Hér að neðan má sjá yfirlit yfir þau embætti sem innkomin mál féllu undir. Tölur sem varða hvert embætti lýsa því hvar viðkomandi starfsmaður var starfandi sem kvartað var yfir eða eftir atvikum lögð fram kæra vegna.




Til skýringar skal nefnt að ef mál varðar lögreglumann hjá tilteknu lögreglustjóraembætti og mögulega er um refsivert athæfi að ræða, þá er það mál sent héraðssaksóknara til meðferðar. Ef málið er ekki refsímál, heldur agamál, er það sent þeim lögreglustjóra sem er yfirmaður viðkomandi lögreglumanns.



*Sum mál varða fleiri en eitt embætti.

4.5 Málsmeðferðartími

Samkvæmt 5. gr. reglna nr. 222/2017 um nefnd um eftirlit með lögreglu skal nefndin hraða meðferð máls eins og kostur er og að jafnaði ljúka meðferð þess innan mánaðar frá móttöku erindis. Meðalmálsferðartími var 229 dagar samanborið við árið á undan en þá var hann 220 dagar. Árið 2020 var hann 236 dagar.




Eins og fram hefur komið í fyrri skýrslum nefndarinnar er ljóst að langt er í land við að ná málsferðartímanum niður í einn mánuð, sérstaklega í ljósi þess hve langan tíma tekur að fá

nauðsynleg gögn afhent frá lögregluembættum. Þá fjölga verkefnum nefndarinnar með hverju árinu og er því ljóst að til þess að ná fram markmiði reglugerðarinnar, er jafnframt nauðsynlegt að auka stöðuástand nefndarinnar. Með hliðsjón af framangreindri þróun telur nefndin að raunhæfara markmið hvað varðar almennan málsmeðferðartíma væru 3 mánuðir.


4.6 Málum lokið frá stofnun nefndarinnar til ársins 2022.

Árið 2017 lauk nefndin umfjöllun 22 mála, 46 mála árið 2018, 75 mála árið 2019, 98 mála árið 2020, 108 mál árið 2021, 2022 lauk nefndin umfjöllun um 135 mál í heildina. Er því ljóst að afköst og skilvirkni nefndarinnar hafa aukist jafnt og þétt.



4.7 Frumkvæðisathuganir.

Neðangreind tafla gerir grein fyrir þeim fjölda mála sem nefndin ákvað að taka til athugunar að eigin frumkvæði. Eins og sjá má hefur dregið heldur úr þeim fjölda frá árinu áður. Frumkvæðisathuganir nefndarinnar varða misjöfn atriði/atvik, stór sem smá, sem ella hefðu verið látin óáreitt. Athuganirnar eru til þess fallnar að veita verklagi og störfum lögreglu aukið aðhald og rými til bóta.



5. Yfirlit um starfsemi ársins 2022

5.1 Skipulag og starfsaðstaða

Heimasíða nefndarinnar er á slóðinni www.nel.is. Á heimasíðunni er að finna eyðublöð fyrir tilkynningar til nefndarinnar, á íslensku, ensku og pólsku, ásamt nánari upplýsingum um málsmeðferð, hlutverk og skipan nefndarinnar auk tölfræði yfir málafjöld nefndarinnar.

Hægt er að hafa samband við nefndina með því að senda tölvupóst á nel@nel.is eða bréfpóst á heimilisfangið: Nefnd um eftirlit með lögreglu, Borgartún 29, 105 Reykjavík. Þá var hægt að hafa samband símleiðis við lögfræðing nefndarinnar á símatíma sem var milli kl. 10 og 11 alla virka daga árið 2022.

5.2 Yfirlit yfir fundi nefndarinnar

Formlegir fundir nefndarinnar á árinu 2022 voru samtals 18. Nefndin tók 73 ákvarðanir á starfsárinu um erindi sem bárust nefndinni í formi kvartana eða kærumála og kom þeim til meðferðar innan lögreglu eða ákærvalds eftir því sem við átti. Nefndin fjallaði þar að auki um 61 mál sem hún fékk til skoðunar eftir að meðferð þeirra lauk hjá lögreglu eða ákærvaldi.

5.3 Fjármál nefndarinnar

Ráðherra ákveður þóknun nefndarmanna. Allir aðalmenn í nefndinni vinna að verkefnum hennar í hlutastarfi á grundvelli fastrar þóknunar. Föst þóknun formanns á mánuði er um 200.000 kr. og er þar um heildarlaun að ræða. Aðrir aðalmenn í nefndinni fá helming þeirrar þóknunar. Formaður hefur samkvæmt lögum það hlutverk að ráða starfsmenn nefndarinnar. Starfsmannamál og daglegur rekstur eru því í meira mæli á hans herðum en annarra nefndarmanna. Þar sem starfsmaður er aðeins einn þá hefur það jafnframt verið hluti af verkefnum formanns að hafa innsýn í skipulag og gang verkefna hjá starfsmanninum og taka beinan þátt í skrifum bréfa og ákvarðana. Varamenn fá greidda þóknun fyrir þá fundi sem þeir sækja.

Heildarkostnaður vegna reksturs nefndarinnar árið 2022 nam 19.800.427 kr. Stærstur hluti kostnaðarins voru laun og launatengd gjöld, en samtals nam sá kostnaðarliður á árinu 17.438.676 kr. Var þar um að ræða laun og launatengd gjöld fyrir fastan starfsmann nefndarinnar ásamt launum nefndarmanna. Annar kostnaður var rúmlega 2 m. kr. Þar var um að ræða kostnað vegna leigu á skrifstofu, afnotagjöld vegna hýsingar á vefsíðu nefndarinnar, kostnað vegna ferðalaga nefndarmanna og starfsmanns innanlands, kostnað vegna námskeiða og annars tilfallandi kostnaðar vegna skrifstofubúnaðar.

*Reykjavík,
19. desember 2023*

Skúli Þór Gunnsteinsson
varaformaður

Kristín Edwald

Þorbjörg I Jónsdóttir